


1 4  
1777  
25





山房

隨筆





門丁  
號 1777  
卷 25

山房  
筆

早稻田大學圖書館  
藏書  
33.3.31

欽定四庫全書總目卷一百四十二

山房隨筆一卷

元蔣子正撰子正不知何許人惟書中杜善甫一條內有余分教溧陽語知嘗為溧陽學官又有穆陵在御語知為宋人入元者也所記多宋末元初之事而於賈似道事尤再三深著其罪於鄭虎臣木棉菴事敘述始末亦比他書為最詳惟所記陸秀夫輓張世傑詩似出附會厓山舟覆鯨海沸騰烏有吟詠之暇且詩中曾聞海上鐵斗膽句亦不似同時之語朱國楨湧幢小品謂世傑溺死在秀夫赴海之後亦以此詩為疑所言良允殆好事者欲褒忠義故造斯言歟至於以夏貴之降歸咎似道未為無理而反復解釋反似於貴有恕詞未免有乖大義觀者不以詞害意可矣



山房隨筆

梨一

全 愚 蔣 正 子 平 仲

辛稼軒帥浙東時晦菴南軒任倉憲使劉改之欲見辛  
不納二公為之地云某日公燕至後筵便坐君可來門  
者不納但誼爭之必可入既而改之如所教門外果誼  
譁辛問故門者以告辛怒甚二公因言改之豪傑也善  
賦詩可試納之改之至長揖公問能詩乎曰能時方進  
羊腰腎羹辛命賦之改之對寒甚欲乞卮酒酒罷乞韻  
時飲酒手顫餘瀝流於懷因以流字為韻即吟云拔毫  
已付管城子爛首曾封關內侯死後不知身外物也隨  
尊酒伴風流辛大喜命其嘗此羹終席而去厚餽焉席  
散南軒邀至公廨置酒語之曰先君魏公一生公忠為  
國功厄於命來挽者竟無一篇得此意願君有作以發



幽潛改之卽賦一絕云背水未成韓信陣明星已隕武侯軍平生一點不平氣化作祝融峰上雲南軒爲之墮淚今龍洲集中不見此二詩豈遺之邪又云稼軒守京口時大雪帥寮佐登多景樓改之敝衣曳履而前辛令賦雪以難字爲韻卽吟云功名有分平吳易貧賤無交訪戴難自此莫逆云

李公山節汾洲人也端平中朱湛盧復之使北展覲八陵引李與王仲偕南李初任鄉郡節制司幹官後任西山倅時正倅陳三嶼松龍會寮友於多景樓賞楊妃菊令諸妓各持紙筆侍眾官請詩李自江下後至酒一行起背手數步吟云命委馬嵬坡畔泥驚魂飛上傲霜枝西風落日東籬下薄倖三郎知不知辭至精切或至閣

筆  
西山張倅芸窗有繡養娘者命蒼頭遞一羅帕與館人

劉啟之童偶遺之於地芸窗責劉卽遣去劉作詩謝張云夜深搗鼓醉紅裙半世侯門熟稔聞自是東鄰窺宋玉非關司馬挑文君蒼頭誤送香羅帕簧舌翻成貝錦文幸賴老成持定力一帆安穩過溪雲李邦美過句容之村鄉見酒肆粉壁明潔題云青裙白面鬪挑菜茅舍竹籬疏見梅未及後聯店翁怒曰我以此壁爲人塗污方一新之今爾又作俑也遂不書有客續至問翁翁悔之一日李再過之翁請足成李笑取筆書云春事隔年無信息一聲嗁鳥喚將來往來知音皆愛之

寶祐甲寅江東多虎有司行禮禳之典青詞末聯云雖曰寅年之足或有數存去其乙字之威尚祈神力蓋古詩有寅年足虎狼之句傳謂虎威如乙字對屬甚切京口韓香除夜請客作桃符云有客如擒虎無錢請退



之以其姓爲對也

直北某州有道君題壁一詩云徹夜西風撼破扉蕭條  
孤館一燈微家山回首三千里目斷天南無雁飛  
曾聞海上鐵斗膽猶見雲中金甲神乃陸樞密君實挽  
張郢州世傑詩也張公擁德祐景炎祥興於海上各擁  
兵南北岸一夕大風雨行止皆不利張舟覆而薨翌早  
獲屍棺殮焚化其膽如斗大而焚不化諸軍感慟忽雲  
中見金甲神人且云今天亡我關係不輕後身當出恢  
復矣此詩全篇不傳忠義英烈雖亡尤耿耿也  
曾本真號月湖半顛賦吳門上元云村翁看了上元歸  
正是西樓月落時誇道官衙好燈火不知渾點爾膏脂  
微聞於郡守吳退菴遂命住虎邱寺  
有刺夏金吾貴云節樓高聳與雲平通國誰能有此榮  
一語淮西聞養老三更江上便抽兵不因賣國謀先定

何事勤王詔不行縱有虎符高一丈到頭難免賊臣名  
人謂北兵既至許貴以淮西一道與之養老故戢兵不  
戰然宋當國者處置失宜方詔貴及其子松上流策應  
又知正陽失利松已死不能無憾又俾受孫虎臣節制  
乃大不樂本無戰心況秋壑退師數十萬眾一鼓而潰  
夏雖勇健亦何爲哉

京口天慶觀主聶碧窗江西人嘗爲龍翔宮書記北朝  
赦至感而有詩云乾坤殺氣正沈沈又聽燕臺降德音  
萬口盡傳新詔好累朝誰念舊恩深分茅列土將軍志  
問舍求田父老心麗正押班猶昨日小臣無語淚沾襟  
又哀被虜婦云當年結髮在深閨豈料人生有別離到  
底不知因色誤馬前猶是買臙脂又詠北婦云雙柳垂  
肩別樣梳醉來馬上倩人扶江南有眼何曾見爭卷珠  
簾看固姑觀中有趙太祖眞容北來者見必拜聶因題



其上云鳳表龍姿儼若新一回展卷一傷神天顏亦怪  
君非虜河北山東總舊臣

梁棟隆吉題茅峰云杖藜絕頂窮追尋青山世口開  
嶽碧雲遮斷天外眼春風吹老人閒心大君升天寶劍  
化小龍入海明珠沈何人更守元帝鼎有客欲問秦王  
金顛崖誰念受辛苦古洞未易尋幽深神光不破黑暗  
惱山鬼空作離騷吟安得長松撐日月華陽世界收層  
陰長笑一聲下山去草木爲我畱清音隆吉以戊辰登  
科任仁和尉老依元符宮宗師許道杞許甚禮之且賙  
其家梁好嘲罵眾道士惡之遂牋此詩告官以譏時逮  
捕金陵備嘗笞楚卒得免亦終不偶而殂

吳履齋開慶之變再入相四明士子上詩來則非邪抑  
是邪綠隄何必更行沙瑟當調處難膠柱碁到危時見  
作家公論有誰能著腳事機至此轉聾牙不如壘嶂雙

溪下行對青山坐看花言者附賈似道描畫彈劾貶循  
州而殂饒州士熊某嘲之云近來西北又干戈獨立斜  
陽感慨多雷爲元城驅劫火天胡丁謂活鯨波九原誰  
起先生死萬世其如公論何道過雕峰休插竹想逢宗  
老續長歌菊巖季苾祭以文曰潞公不能不疏溫公不  
能不毀趙忠簡不能不遷寇萊公不能不死爾民無福  
豈天奪之我士無祿豈天厭之嗚呼後世而無先生者  
乎孰能志之後世而有先生者乎孰能待之

永嘉余德鄰宗文與聶碧窗弈棋余屢北有賣地仙丹  
者國手也余呼之至給聶云某有僕能棋欲試數著不  
敢聶俾對枰連敗數局余自內以片紙書十字可憐道  
士碧不識地仙丹聶大笑曰吾固疑其不凡  
三山林觀過年七歲嬉游市以鬻詩自命或戲令詠  
轉矢氣云視之不見名曰希聽之不聞名曰夷不啻若



自其口出人皆掩鼻而過之林曾試神童科不甚達  
三衢畱中齋甲辰大魁文山宋瑞丙辰大魁中齋作相  
身享富貴三十年仕北為尚書文山纔登第丁父憂仕  
塗亦坎壈乙亥糾義兵勤王終以罔功患難中倚之為  
重雖名為相黃扉之貴萬鍾之奉無有也江西羅壺秋  
詩云嚙雪蘇郎受苦辛庾公老作北朝臣當年龍首黃  
扉客猶是衡門一樣人中齋物色將羅織之亟歸而免  
辭制機言有賀自長沙移鎮南昌者啟云夜醉長沙曉  
行湘水難教檣燕之畱杜朝飛南浦暮卷西山來聽佩  
鸞之舞班又有賀除直祕閣依舊松江制置司幹辦公  
事云望玉宇瓊樓之邃何似人間從綸巾羽扇之游依  
然江表上巳請客云三月三日長安水邊多麗人一詠  
一觴會稽山陰修禊事又云良辰美景賞心樂事四者  
難并崇山峻嶺茂林修竹羣賢畢至姚橘洲尹臨安時

吳履齋拜相姚語諸客作啟賀之商量起句彭晉叟云  
轉鴻鈞運紫極萬化一新自龍首到黃扉百年幾見  
陳雲屋嘲翟兄之姓云失足如何躍無光耀不成若非  
身倚木為權亦難行時權館水南楊氏蓋嘲其倚楊也  
莫兩山傷丁氏故基題一絕於太虛堂疏雨斑斑灑葉  
舟前山喚客作清游芳華消歇春歸後野草荒田一片  
愁  
文本心典淮郡蕭條之甚謝賈相啟中云人家如破寺  
十室九空太守若頭陀兩粥一飯  
蔣復軒鑷白髮詩云勸君休鑷鬢毛斑鬢到斑時已自  
難多少朱門少年子業風吹上北邙山  
杜氏婦作北行詩江淮幼女別鄉閭一似昭君遠嫁胡  
默默一身離故國區區千里逐狂夫慵拈簫管吹羌曲  
懶繫羅裙舞鷓鴣多少眼前悲泣事不如花柳舊江都



此等多有戲作題之驛亭以為美談

許平仲衡學問文藝為世所尊稱為夫子人目為許先生養志不仕有辭召命詩云一天雷雨誠堪畏千載風雲漫企思畱取閒身臥田舍靜看蝴蝶挂蛛絲可以觀其志矣一號魯齋

張文簡雪詩銀簷不雨溜常滴玉樹無風花自開其家集不收

盧梅坡詠梅開一花詩云昨夜花神有底忙先教蹋白入南邦冷將雙眼窺春破肯把孤心受雪降礬弟得兄呼最長竹君取友歎無雙試於月夜窗前看一在枝頭一在窗

杜善甫山東名士工詩文不屑仕進游嚴相之門嚴適濟南望族善甫為所敬重一日讒者閒之情分浸乖杜謝以詩云高臥東窗興已成簾鉤無復挂冠聲十年恩

愛淪肌髓只說嚴家好弟兄嚴悟非其過款密如初時有掌兵官遠戍於外其妻宴客笙歌終夕善甫詩曰高燒銀燭照雲鬢沸耳笙歌徹夜闌不念征西人萬里玉關霜重鐵衣寒聞者快之有薦之於朝遂召之表謝不赴中二聯云俾獻言於乞言之際敢盡其忠若求仕於致仕之年恐無此理不能為白居易漫法香山居士之名惟願學陸龜蒙拜賜江湖散人之號予分教溧陽一淮士過求宿學舍士游山東甚久為余道其辭甚多僅記此

楊煥然號關西夫子題孔子廟會見春風入杏壇奎文閣上獨凭闕淵源自古尊洙泗祖述何人似孟韓竹簡不隨秦火冷楷林高倚魯城寒漂零蹤跡千年後無分東家寄一筆又党懷英詩魯國遺蹤墮渺茫獨餘林廟壓城荒梅梁分曙霞棲影松牖回春月駐光老檜曾霑



周雨露斷碑猶是漢文章不須更問傳家久泰岱參天  
汶泗長党承安閒人工篆書嘗作杏壇二字刻於祖庭  
翟惠父詠鬼門關盤盤重險壓三塗慘慘陰靈怖萬夫  
青海戰魂來守鑰黃塵行客過張弧西風古道悲羸馬  
落日荒山嘯老狐年少文人今白首小昌休苦笑抑揄  
惠父北人

閻子靜復至元閒翰林學士後廉訪浙西有梅杖詩云  
揀盡西湖萬玉柯春風入手重摩挲較量龍竹能香否  
比竝鳩藤奈白何聲破夢寒霜滿戶影隨詩瘦月橫坡  
只知功到調羹盡不道扶顛力更多

元遺山好問裕之北方文雄也其妹爲女冠文而豔張  
平章當揆欲娶之使人屬裕之辭以可否在妹以爲可  
則可張喜自往訪覘其所向至則方自手補天花板輟  
而迎之張詢近日所作應聲答曰補天手段暫施張不

許纖塵落畫堂寄語新來雙燕子移巢別處覓雕梁張  
悚然而出

劉山翁汝進漫塘幼子學問宏深文字典雅與客九日  
游龍山以塵世難逢開口笑分韻翁得口字云縱步龍  
山頭放舟龍蕩口羣然雁鷺行雜之牛馬走我拙不能  
詩我病不飲酒試問賞花人還有菊花否眾服其工諸  
信齋誦此

金國南遷後國浸弱不支又遷睢陽某后不肯播遷  
死於汴元遺山曰羅綺深宮二十年更持桃李向誰妍  
人生只合梁園死金水河頭好墓田

至元戊寅己卯閒有董恢者江陵人後居太原任丁角  
酒稅副使儻屋以居詩云白髮蒼頭一腐儒行無轍跡  
住無廬鄧林萬頃青青木肯爲鷓鴣借一株又翠閣朱  
樓鎖揜扉尋巢燕子不能歸落花吹泥東風雨繞徧芳



簷無處依

漫塘先生與客燕坐指窗外櫻桃唯一實其以為笑忽一客來訪自言能詩因命賦之云燒丹道士藥鑪空枉費先生九轉功一粒丹砂尋不見曉來枝上弄春風眾咸喜之

周芝田浙人浪跡江湖道冠楚服詩酒諧笑略無拘檢亦時出小戲以說人而不知其能琴與詩也遇琴則一彈適興則吟一二句而不終篇嘗賦石上雨竹云淋漓滿腹藏春雨兀半拳生曉雲亦自可人又草香花落後雲黑雨來時琴詩云膝上橫陳玉一枝此音唯獨此心知夜深斷送鶴先睡彈到空山月落時  
遨溪張復題雨竹圖云涓涓而淨森森而立孟宗何之淚痕猶溼風竹圖云可屈者氣不屈者節故人之來盡掃秋月皆有思致

趙靜齋淮被執於溧陽豐登莊至北府辭家廟云祖父有功王室德澤霑及子孫今淮計窮被執誓以一死報君刀鋸置之不問萬折忠義常存急告先靈速引庶幾不辱家門即登棹船發至瓜洲被刑無有敢埋其屍者有一寵姬在焦僉省處此姬啟僉省云趙四知府今日已死矣妾元是他婢子望相公以妾之故夫許妾將屍焚化也是相公一段陰隲事焦許之乃作一棺焚之又啟收骨撒之於水亦從之遂以裙盛骨殖到江邊大慟投江而死又聞其孫享祭靜齋降筆云生居四代將門家不幸遭逢被虜孳死在瓜洲無葬地幽魂夜夜到長沙其兄冰壺潛自京口遷金陵北兵至棄城而遁南徙不返死葬海旁山上

吳門有吏娶一娼燕客歌舞徹旦明日死事決配九江與婦泣別登舟盧梅坡詩云昨夜笙歌燕畫樓明朝揮



淚送行舟當初嫁作商人婦無此江頭一段愁

一戶曹之妻與太守有私府學一士子知其事戶曹任滿將去守招其夫婦飲士子作祝英臺近付妓令歌之掩琵琶臨別語把酒淚如洗似恁春時倉卒去何意牡丹恰則開園茶靡廝句便下得一帆千里好無謂復道明日行呵如何戀得你一葉船兒休要更沈醉後梅子青時楊花飛絮側耳聽喜鵲哩守與此婦俱墮淚其夫不悟

靈隱寺主僧元肇號淮海寺有松大數十圍史相當軸遣人伐松松與月波亭相對僧作詩云大夫去作棟梁材無復清陰覆綠苔惆悵月波亭上望夜深惟見鶴歸來

穆陵在御閭貴妃父良臣起香火功德院欲勝靈竺乃伐鄰松供屋材僧作詩曰不為栽松種茯苓祇緣山色

四時青老僧不惜攜將去畱與西湖作畫屏詩徹於上遂命勿伐又山中有寺基久圯勢家規其地營葬僧亦有詩刺之一定空山已有年不須惆悵起頽磚道旁多

少麒麟冢轉眼無人送紙錢遂不復取

吉州羅西林集近詩刊一士囊詩及門一童橫臥根闌

閒良久喚童起曰將見汝主人求刊詩童曰請先與我

一觀我以為可則為公達客怪之曰汝欲觀吾詩汝必

能吟請賦一詩當示汝童請題客曰但以汝適來睡起

搔首意為之童即吟曰夢跨青鸞上碧虛不知身世是

華胥起來搔首渾無事嗚鳥一聲春雨餘客駭伏同入

見西林款之數日取其菊詩云不逐春風桃李妍秋風

收拾短籬邊如何枝上金無數不與淵明當酒錢童子

羅之子也

南康建昌縣有神童山每大比試童子至百人七取其



一有鄧文龍年八歲穎出諸童子右方岳巨山守南康  
欲祝爲子父謂之曰汝予所鍾愛太守固欲祝汝將若  
何文龍曰第許之巨山一日招諸名士如馮紫山深居  
兄弟者而鄧父子與焉席上太守及諸公祇服褙子文  
龍以綠袍居座末坐定供茶文龍故以托子墮地諸公  
戲以失禮文龍曰先生衽衣學生落托衆爲一笑酒酣  
巨山戲曰口紅衣綠如鸚鵡文龍應曰頭白形烏似老  
鴉又令賦君子竹卽詠曰蕭灑子猷宅平將風月分兩  
軒渾似我一日可無君眾異之後易名元觀年十五領  
鄉薦登上第

僧德豐三山人有重陽詩云戰盡今秋見太平西風多  
作北風聲不吹烏帽吹氈帽籬下黃花笑不成鍾山長  
老舉以自代答云耿耿孤吟對古梅忽傳軍將送書來  
倚崖枯木摧殘甚虛負陽和到一回竟不赴

賈秋壑敗師亡國後有人刺以詩曰深院無人草已荒  
漆屏金字尚輝煌祇知事去身宜去豈料家亡國亦亡  
理考發身端有自鄭人應夢果何祥臥龍不肯畱渠住  
空使晴光滿畫牆又云事到窮時計亦窮此時難倚鄂  
州功木綿菴上千年恨秋壑堂中一夢空石砌苔稠猿  
步月松庭葉落烏呼風客來未用多惆悵試向吳山望  
故宮又傷西樓詩云檀版歌殘陌上花過牆荆棘刺簷  
牙指麾已失鐵如意賜予盃存玉辟邪破屋春歸無主  
燕壤池雨產在官蛙木綿菴外尤愁絕月黑夜深聞鬼  
車有人和云榮華富貴等浮花臂力難勝國爪牙漢世  
祇知光擁立唐朝誰識杞姦邪綺羅化作春風蝶絃管  
翻成夜雨蛙縱有清漳人百死碧天難挽紫雲車秋壑  
出處本末自有知者茲不書

秋壑在朝有術者言平章不利姓鄭之人因此每有此



姓爲官者多困抑之武學生鄭虎臣登科輒以罪配之  
後遇赦得還秋壑喪師陳靜觀諸公欲置之死地遂尋  
其平日極仇者監押虎臣遂請身爲之乃假以武功大  
夫押其行虎臣一路凌辱至漳州未繇菴病泄瀉踞虎  
子欲絕虎臣知其服腦子求死乃云好教作只恁地死  
遂趨數下而殂

庚申履齋吳相循州安置以賈似道私憾之故未幾除  
承節郎劉宗申知循州劉江湖游士專以口舌嚇迫當  
路要人貨賄官爵士大夫畏其口姑厚餽彌縫之其得  
官亦由此守循之除似道欲其殺吳相宗申至郡所以  
捐撫履齋者無所不至隨行吏僕以次病亡或謂置毒  
所居井中故飲水者皆患足輒而死履齋終不免似道  
後亦遭鄭虎臣之辱其時趙介如守漳賈門下客也宴  
虎臣於公舍秋壑亦與焉介如欲客似道似道不可以

讓虎臣口口稱天使惟謹虎臣不讓似道側坐於下介  
如察其有殺賈意命館人啟鄭且以辭挑之於時似道  
衣服飲食皆爲鄭減抑介如作錦衣等餽之見其行李  
輜重令截寄其處伺得命放回日取之其館人語鄭云  
天使今日押練使至此度必無生理曷若令速殞免受  
許多苦惱鄭云便是這物事受得這苦欲死而不死未  
幾遂殞趙往哭鄭不許趙固爭鄭怒云汝欲檢我耶趙  
云汝也宜得一檢然未如之何趙經紀棺斂且致祭其  
辭云嗚呼履齋死循死於宗申先生死聞死於虎臣嗚  
呼云云祇此四句然哀激之悃無往不復之微意悉寓  
其中季一山閉爲郡學正爲予道之  
似道敗後有題其養樂園曰老壑曾居葛嶺西游人誰  
敢問蘇隄勢將覆餗不回首事到出師方噬臍廢圃久  
無人作主敗垣惟有石畱題算來祇有孤山耐依舊梅



山房隨筆  
花伴月低養樂者以其奉母而樂也其賜弟正在蘇隄  
葛嶺孤山之近游人常盛自賈據此有游騎過其門必  
爲偵事者察報每爲所羅織有官者被黜有財者被禍  
逮世變而後已有人題葛嶺二詩云當年誰敢此經過  
相國門前衛士多諸葛功名猶未滿周公事業竟如何  
雕梁雨蠹藏狐鼠花礎雲蒸長薜蘿萬死莫酬亡國恨  
空畱遺跡在山阿又云樓臺突兀妓成圍正是襄樊失  
援時玉氣暗隨檀版歇江聲流入玉簫悲姓名不在功  
臣傳家廟徒存御賜碑誤國誤民還自誤滿庭秋草露  
垂垂

右山房隨筆元蔣正子平仲著明初寫本較商氏稗  
海所刊殊勝開卷平仲二字即商本所脫也中如党  
懷英孔子廟詩末句泰岱參天汶泗長誤汶泗爲汾  
水相去不啻千里矣梅梁松牖一聯證以石刻亦此

本爲是聶碧窗北婦詩云江南有眼何曾見爭卷珠  
簾看鷓鴣初不解其旨及檢此本則鷓鴣爲固姑由  
校者不知固姑爲婦人冠名妄易鷓鴣以趁韻耳題  
趙太祖眞容河北山東總舊臣誤臣字爲君字則竝  
上新神之韻不押矣大抵稗海中一無佳刻其間如  
趙德麟侯鯖錄周煇清波雜志王闢之澠水燕譚錄  
張邦基墨莊漫錄方勺泊宅編之類脫謬尤甚吾家  
藏本俱極完整惜未能一一刊正以還舊觀閒窗展  
翫有撫几太息而已乾隆戊申二月上浣知不足齋  
書



山房隨筆

Blank writing area with vertical lines.

山房隨筆補遺

端平中余申周翰分教毘陵題捷人簿云三年大比視郊祀天地之禮均萬乘臨軒與封拜公孤之儀等中一聯云昭陵之仁如天積歲月而養成巨棟歐公之學如海鼓波濤而放出老龍惜未見全篇天台陳剛中孚在燕端陽日當母誕作大常引二章云綵絲堂上簇蘭翹記生母正今朝無地捧金焦奈煙水龍沙路遙碧天迢遞白雲何處急雨蕭蕭萬里夢魂消待飛逐錢塘夜潮其二短衣孤劍客乾坤奈無策報親恩三載隔晨昏更疏雨寒鐙斷魂赤城霞外西風鶴髮猶想倚柴門蒲醅漫盈尊倩誰寫青山淚痕時為編修云

三山卓用字稼翁能賦馳聲嘗作詞云丈夫隻手把吳



鉤欲斷萬人頭因何鐵石打成心性卻為花柔君看項籍并劉季一怒使人愁只因撞著虞姬戚氏豪傑都休其為人溺志可想

翰林學士王文炳鐵椎銘朱亥貢金張良受之合以忠義鍛成此鎚銅山可破鎚不可缺金墀可碎鎚不可折噫亂臣滔滔四海嗷嗷長蛇其毒封豕其饕上帝憤之以鎚昇著著狂也鎚不自奮假手於汝數未莫先時來敢後曾是一揮元兇碎首匪鎚之重唯人之勇匪鎚之功惟人之忠長僅數尺重纔數斤物小用大策此奇勛鎚在人亡再用者誰藏之武庫永鎮姦回

陳野水言昔紹興學正任滿後入城給取解由道經婺境至山中村舍時暑行倦飢渴入一野室見數人擣桐油一老下確詢所以來野水言自紹興又問往紹興何為野水言學正任滿往倒解由老笑曰汝自倒解由我

自擣桐油上確不顧野水怪之出問其鄰曰此何人也鄰人云此我郡傅省元兵革以來隱處山中父子確油種藝以自給野水取紙書一絕云忽遇山中避世翁居然沮溺古人風白頭方作求名計不滿先生一笑中傳觀詩訖召坐曰子真悟者邪即命置飲食勞之要之山澤之腥長往不返者顛崖果何限也役役蝸蠅苟竊升斗彼視之一噓耳

採花王昂榜下擇婿時作催妝詞云喜氣滿門闌光動綺羅香陌行紫薇花下悟身非凡客不須脂粉污天真嫌怕太紅白畱取黛眉淺處其畫章臺春色  
湘人陳說登第授岳陽教官夜踰牆與妓江柳狎頗為人所知時孟之經守岳聞其故一日公燕江柳不侍呼至杖之文其眉鬢間以陳說二字仍押隸辰州妓之父母詣學宮答說云自岳去辰八百里且求資糧陳且泣



且悔罄其所有及資衣物得千緡以六百贈柳餘付監押吏卒令善視且以詞餞別云鬢邊一點似飛鴉休把翠鈿遮二年三載千關百就今日天涯楊花又逐東風去隨分入人家要思量除非酒醒休照菱花柳將行會陸雲西以荆湖制司幹官需檄至岳與陳有故將至陳先出迎以情告陸陸即取空名制幹劄填陳姓名檄入制幙既而竝迎陸入即開宴陸曰聞籍中有江柳者善謳誰是也孟即呼至柳花鈿隱眉閒所文飲閒陸越語孟曰能以柳見予否孟曰唯命陸笑曰君尚不能容一陳教豈能與我孟因敘說之過陸歎慨既而終席陸呼柳問其事柳出說送別詞陸大嗟賞而再登席陸舉詞示孟且謂之曰君試目此作可謂不知人矣今制同檄說入幙將若之何孟求解於陸并召說同宴明日列薦說且除柳名陸遂將說如江陵見之閻公秋壑俾充

幙僚說不獨洗一時之辱且有倖進之喜至今巴陵為佳話矣

楊州瓊花天下祇一本士大夫愛重作亭花側扁曰無雙德祐乙亥北師至花遂不榮趙棠國炎有絕句弔曰名擅無雙氣色雄忍將一死報東風他年我若修花史合傳瓊妃烈女中

北方王郎中有有歸婦吟其序曰天馬浮江兵強將銳所征無敵所掠無遺俘戮之民奚啻億萬然生死存亡悲歡聚散豈無數存乎其間夫劉氏者吉之永豐人也問其父母兄弟舅姑夫與子皆在焉夫我不知則已既知之何獨不令其歸也於父母乎吾力雖不能使其死者生亡者存亦可謂歡悲聚散者嗚呼不幸之幸莫大於斯故不可無一言以送之東平士王宥詩曰烈火俱將玉石焚死生契闊憶中分信音一絕思青鳥淚眼雙



穿望白雲殘日鶴鴿還有難北風鴻雁正離羣新詩送  
汝還家去重續當年織錦文

交交桑扈交交桑扈桑滿牆陰三月暮去年蠶時處深  
閨今年蠶時涉遠路路傍忽聞人采桑恨不相與攜傾  
筐一身不蠶甘凍死祇憶兒女無衣裳○不如歸去不  
如歸去家在浙江東畔住離家一程遠一程飲食不同  
言語異今之眷聚皆寇讐開口強笑心懷憂家鄉欲歸  
歸未得不如狐死猶首邱○泥滑滑泥滑滑脫了繡鞋  
脫羅襪前營上馬忙起行後隊搭駝疾催發行來數里  
日已低北望燕京在天末朝來傳令更可怪落後行遲  
都砍殺○鴉鵲鴉鵲鴉鵲帳房徧野常前呼阿姊含羞  
對阿妹大嫂揮涕看小姑一家不幸俱被虜猶幸同處  
為妻孥願言相憐莫相妬這箇不是親丈夫辭意婉切  
誦之可傷此金沙潘武子文虎四禽言詞也少有雋才

善賦

梁棟隆吉亦作四禽言云不如歸去錦官宮殿迷煙樹  
天津橋邊叫一聲叫破中原無住處不如歸去○脫卻  
布袴貧家能有幾尺布寒機織盡無得裁可人不來廉  
叔度脫卻布袴○提葫蘆近來酒賤頻頻沽眾人皆醉  
我亦醉湘江喚起醒三閭提葫蘆○行不得也哥哥湖  
南湖北春意多九疑山前叫虞舜奈此乾坤無路何行  
不得也哥哥寓意甚遠諸作不及







澹	第
餘	記

澹餘筆記

梨

偶讀弇山堂別集中盛事異典諸纂嘉其典博精覈  
有良史風裁因卽我  
皇清

世祖皇帝十八年中不佞耳目所偶及者附識楮端以  
備異日纂輯之助然所記不過一朝之事且非有載  
籍可稽挂一漏萬在所不免聊取寄興非能續其書  
也昔康熙改元歲壬寅臘月朔有十日澹餘居士書  
本朝以武功耆定肇建丕基一時從龍者盡南陽之  
彥宜力者多虎賁之臣或奕世通侯或一門簪笏與  
國咸休固其宜也獨是新進之士甫出蓬茅旋膺寵  
渥甚者眷顧儼於元勛遭逢出於不次我



世祖皇帝右文待士之體振古未有故不佞所記每於此致惓惓云康熙二年正月廿六日澹餘再識

慈闈重慶

昭聖慈壽恭簡安懿章慶太皇太后

仁憲皇太后

慈和皇太后此三宮并尊乃康熙改元後事以朝廷盛典故敬識之

異姓封王

考明之王爵皆歿後追贈耳我

朝身為王者凡五家平西王吳三桂定南王孔有德平南王尚可喜靖南王耿繼茂義王孫可望唯孔歿於王事無子國絕而耿已再傳吳且以異姓而晉號親王矣夫孔尚耿以從龍吳以翊戴且咸有廓清混一之功帶礪錫之不為過也獨是孫以逋逃之餘未效尺寸倖而

邀一字之封迨身歿而兩子相繼襲也豈非幸哉豈非幸哉

江南鼎甲

丁亥狀元呂宮武進人榜眼程芳朝桐城人探花蔣超金壇人 壬辰狀元鄒忠倚無錫人探花沈荃華亭人 乙未探花秦斌無錫人 戊辰狀元孫承恩常熟人榜眼孫一致鹽城人探花吳國對全椒人 己亥狀元徐元文崑山人榜眼華亦祥無錫人探花葉方藹崑山人 辛丑狀元馬世俊溧陽人

父子尚書

弇州所紀父子為尚書者凡數十家未有父子比肩為尚書者也

本朝宛平王公崇簡以太子太保禮部尚書掌部事而子熙以禮部尚書翰林院學士掌院事為經筵日講官



父子同時為大宗伯從來未有而熙復日侍密勿寵絕百僚尤為盛也

父子三品九卿

掖縣張公忻以前代刑部尚書歸

朝為天津巡撫副都御史子端為內院大學士

父子翰林

本朝父子同時為翰林者今少傅大名成公克鞏為學士時子亮為編修桐城方公拱乾為少詹事子<sup>玄</sup>成為侍讀學士加一級方且父子同時三品矣

父子同科

文登于公鵬翰與子漣同舉順治乙未進士即不佞同榜也

兄弟三品九卿

真定今大司馬梁公清標今吏部右侍郎清寬原任吏

部右侍郎清遠兄弟皆為少宰尤奇清寬清標同產清遠從昆季也又曲沃兵部左侍郎衛公周<sup>胤</sup>今少師大學士周祚

兄弟翰林

兄弟同時為翰林者真定梁公清寬清標同為學士武進莊庶子同生檢討朝生孝感熊檢討賜履賜璵熊雖從昆季然同以會魁入詞林尤為盛事

父任內閣尚書子登第

順治乙未涿州馮太保銓見任大學士而子源濟登第入詞林滄州戴公明說為戶部尚書子王綸及第榜眼為編修可謂一時之盛

父子兄弟同時貴盛有文名

桐城方公拱乾以耆望起為少詹事子<sup>玄</sup>成至侍讀學士亨咸至監察御史育盛育茂俱登賢書詩文翰墨輝



映當時迨幼子章鉞再登丁酉賢書遂有五子登科之謠而一敗塗地矣

### 大僚封父

吾郡太宰孫公廷銓父封少保兼太子太保戶部尚書再封吏部尚書滄州戴公明說父封戶部尚書孟縣薛公所蘊父封禮部左侍郎加二級三公皆迄今矍鑠如盛年戴薛兩家皆見其孫登第爲顯官薛公以少宗伯歸養林下且具慶也豈非盛事

### 直隸盛事

順治十八年一時大僚多畿輔所產內院大學士成公克鞏大名人李公燾高陽人戶部尚書杜公立德寶坻人禮部尚書王公崇簡宛平人兵部尚書梁公清標真定人刑部尚書高公景新安人工部尚書傅公維麟靈壽人都察院左都御史魏公裔介柏鄉人通政使司通

政使曹公國柄大興人其餘侍郎學士不下數人而九卿之長遂居其七獨吏部尚書爲孫公廷銓大理寺卿爲不佞申吉爲山東人耳其年宗伯王公致政及不佞引疾歸代之者爲沙公澄王公度皆山東人也直隸之盛極矣

### 一門盛事

父子兄弟貴盛一時者真定梁氏桐城方氏外涿州馮太保銓以內閣致政居京師奉朝請長子源淮爲都督僉事充鎮守荊州總兵官次子源濟爲翰林院侍講充日講官文武之盛萃於一門

### 師弟同居內閣

馮太保銓居內院而金太傅之俊繼之後馮致政居京師改院爲閣兩公同爲中和殿大學士金公馮公已未所取士也且兩公同正拜三公尤奇又胡少傅世安與



李宮保壽同枚卜胡由大宗伯拜武英李由學士拜東閣李公胡公丙戌所教習士也內馮公雖致政而猶得同眾改銜亦為奇遇

林下五相

順治閒寶雞党少保崇雅武進呂宮保宮一以引年一以乞疾同致政賜予異等得馳驛歸馮太保銓致政仍奉朝請聊城傅少保之漸乞疾得假歸不出凡四人迨康熙改元而吳江金太傅之俊復遂引年之請於是林下有五相矣

內閣同鄉

順治癸巳先外大父少傅公與掖縣張文安端同拜閣一歲張公歿而聊城傅公之漸繼拜矣若直隸則大名成公克鞏在位而高陽李公燾繼之皆同時同鄉者也吾郡盛事

順治庚子歲先外大父以少傅大學士居內閣孫公廷銓為吏部尚書馮公溥為吏部右侍郎劉公祚遠由理卿拜副都御史巡撫畿南不佞由外臬入為左通政旋晉廷尉亦一時之偶盛也

偏歷三孤

本朝文臣偏歷三孤者洪太傅承疇馮太保銓金太傅之俊衛少師周祚凡四人而三人皆正拜三公尤奇

出將入相

洪太傅承疇以先朝舊望兼從龍之勛入為大學士理院務出為五省經略開拓滇黔奠安南服文臣中從無其偶

吏兵二部正卿

本朝為兩部尚書者金太傅之俊王襄敏永吉今太宰孫公廷銓



豕卿大拜

溧陽陳公名夏靜海高公爾儼今少傅成公克鞏少師  
衛公祚皆由吏部尚書大拜

敬歷部院之多

劉少保餘祐一為戶部一為兵部一為刑部凡三部今  
太傅之俊一為工部一為兵部一為都察院一為吏部  
凡歷三部一院而後大拜孫太宰廷銓一為兵部一為  
戶部一為吏部凡三部

郎署至尚書不離局

王宮保弘祚自戶部郎中升山西僉事未行仍畱原任  
後洊加卿銜升侍郎尚書不離本署王公雲南乙榜也  
再入內院

陳少保名夏初由豕卿大拜後歸旂閒住復起為吏部  
尚書再入內院陳少保之遜先由禮部尚書大拜旋出

為戶部尚書後復入內院然兩公俱不得善其終也獨  
李宮保爵初由學士大拜後以小事見謫不數月旋復  
原職成少傅克鞏庚子夏以人言落職至冬復原官二  
公亦再入內院者

三主會試

大學士范公文程甯公完我俱連主丙戌丁亥己丑三  
科會試皆三韓生員從龍者也

兩主會試

順治壬辰成少傅克鞏以學士主會試為副總裁辛丑  
以大學士主試為正總裁衛少師周祚以大學士連主  
己亥辛丑會試俱為副總裁成公又一主乙酉江南鄉  
試正考馮太保銓以大學士主丙戌丁亥會試宋少保  
權以大學士主丁亥己丑會試

高年大臣



木朝以大臣引年者党少保崇雅胡少傅世安金太傅  
之俊皆由大學士歸得優禮者而胡禮稍薄三公皆年  
滿七旬耳其尚書而下勒令致仕者不與焉

驟貴

世祖皇帝愛才如渴立賢無方即最膺眷顧者多循序  
漸遷無躐等超拔之事如李宮保爵胡宮少兆龍莊庶  
子同生以國書稱

旨李胡由侍講晉侍講學士莊以史館晉坊職僅遷兩  
階耳獨呂宮保宮以中允驟簡學士未幾即膺大拜踰  
等之貴無如此公

早達

本朝右文好士教行化洽一時縉紳之彥或習年而捷  
南宮弱冠而登清要者指不勝屈況人情習偽年齒易  
欺即曰早達難定其年歲矣姑即知之最確者識之如

左

十八歲王宗伯熙舉進士為庶吉士

十九歲馮學士源濟秦檢討松齡同舉進士為庶吉士

二十歲胡宮少兆龍舉進士為庶吉士

二十一歲不佞申吉成進士為庶吉士

二十四歲不佞申吉為湖廣布政司參議二十六歲為

大理寺卿

二十七歲王宗伯熙為內院學士

二十八歲胡宮少兆龍為內院學士

三十歲胡宮少兆龍加禮部尚書攝吏部戶部事王宗

伯熙加禮部尚書

三十一歲李宮保爵為內院學士

三十四歲李宮保爵為東閣大學士

三十八歲張文安公端為內院大學士



四十以後不為早達不錄

三試魁元

戊戌孫狀元承恩鄉會試俱第四名

狀元大拜

順治丙戌狀元傅公以漸丁亥狀元呂公宮俱為內院大學士俱不出十年

探花入相

溧陽陳公名夏靜海高公爾儼海益陳公之遴皆前代探花也

探花二品

順治丙戌探花李爽棠為禮部左侍郎加二級李即是科會元也

親王將兵

本朝蕩平區字凡將兵者非親王郡王即宗室貝勒也

若非宗室而將兵者始為異耳

恩澤公

順治閒海上黃梧投誠遠授海澄公亦異恩也迨康熙改元而白文選又為承恩公矣

文臣加三公

文臣加三公者洪太傅承疇馮太保銓金太傅之俊凡三人

三品加三少

順治己亥春

特諭晉大僚秩禮部右侍郎兼文淵閣學士胡公兆龍戶部左右侍郎傅公維麟杜公篤祐俱得加太子少保

節鎮三孤

順治閒總督福建李率泰總督四川李國英俱加少保兼太子太保二公皆三韓舊臣也國英至康熙改元歲



以小事被削

學士署部

順治丙申內部學士胡公兆龍奉

命署戶部事又署吏部掌京察

一部二尚書

本朝各部俱設尚書二員一滿人一漢人也又嘗各部設一王理尚書事是且三尚書矣

內閣掌部院

順治開先外大父及高郵王公永吉皆以大學士掌吏部事先外大父歲餘仍回院王公緣事降謫卿寺歿後得贈吏部尚書成少傅克鞏以大學士掌都察院司內外計各一亦歲餘仍回內院按此皆

世祖慎重部院之職故難其選耳後辛丑歲衛少師周祥以大學士掌吏部事俟孫豕宰廷銓假旋仍回內院

循舊典也

內院出為六卿

順治甲午內院大學士陳公之遴出為戶部尚書

內閣審錄

順治庚子

命內閣大學士衛公周祚同內大臣會三法司審錄重囚時衛公原兼刑部尚書銜亦奇

贈吏部尚書

順治戊戌左副都御史王公永吉卒得贈吏部尚書以舊輔臣故也

侍郎非本曹

順治丁酉朱平陰鼎延以工部尚書吏部左侍郎管右侍郎事甚奇

大將軍



本朝各邊鎮帥多仍明號挂將軍印如平蠻（憲）羌之類是也獨平西王所佩稱平西大將軍然以王爵兼之猶未足異往見平雲貴師出其大帥所佩為（憲）南大將軍印此

國家大征討帥亦郡王也若己亥歲以都統劉之源出鎮京口挂鎮海大將軍印斯為異矣又辛丑冬東方于寇作亂其統大兵者亦稱靖東大將軍

科第特恩

順治乙酉山東鄉試以法若真五經違式具題徑准會試得登第入詞林戊戌以丁酉江南鄉試多弊上親行覆試之三試皆以吳珂鳴為首遂令同會試中式者一體殿試得賜出身入詞林法不登鄉試錄吳不登會試錄也

同考試官作序

順治庚子廣東鄉試以正主考兵部主事張登選病不能與事同考高州府推官施佩鳴為後序

欽選庶吉士

順治乙未戊戌己亥三科皆上臨軒親簡庶吉士面行考校次其甲乙乙未以不佞申吉為首戊戌馬晉允為首己亥朱訓誥為首曠典蓋前所未有也

特蒞鄉土

順治丁酉以清苑張公（玄）錫為太子太保兵部尚書都察院右副都御史總督直隸山東河南三省是蒞其本土也若以滿州籍而為本土之方面守令者指不勝屈亦不足為異矣

文武二銜

武臣加公孤在前代為曠典我



朝文武一體總兵官強半保傅反似多於文臣矣甚者甫經投誠卽授三孤如馬寶祁三昇之流比比皆是當之者以爲異典紀之者以爲濫恩也

武臣改文

順治戊子宣府總兵官胡章以大同姜勳之變詣闕自陳身係書生不諳軍旅願得文職自效遂改山東布政使司右布政使其或由前代武職投誠入朝徑授文職者不在此例

文臣國戚

順治丙申選侍講學士石申女爲貴人後申歷遷吏部左侍郎又馮太保銓女被選以待年故未及入宮而馮實受國戚之眷云

定南王女亦人選待年

追諡

順治閒允言者請查明未死事諸臣大學士范景文而

下凡數十人皆美諡洵

聖朝異典也

轉官加秩

先外大父以大學士出理吏部事加太子太保特加一級後回內院辦事加少保皆異數也

文臣異途

本朝以入關以來經營草昧一時雜流多乘時以取功名其由吏員白衣以至方面郡守者不可勝紀其最易者王登進至江西副使范奇才至江西左參議方策至兩淮運使登進乃長班奇才策市井賣菜傭也欽天監正湯若望加至通政使又加正二品又加一級敕賜通<sup>玄</sup>教師太醫院判劉國棟亦知通政使又加正一品服奉兩人并以雜流得極品者也然各不離其局未任他事湯乃大西洋人改<sup>麻</sup>法者就中劉爲尤幸矣



任子大位

楚人李迎暖以任子至工部侍郎順治間惟此一人其餘以任子至方面者多不足為異獨內院典籍加太常卿王鍾龐子原廬至福建按察使蓋不啻過其所出矣

隱逸特薦

世祖銳意求才下舉山林隱逸之詔一時督撫諸臣特舉應詔者山東王啟祚王運熙江南陸貽吉于沚陳台孫吳國龍湖廣胡爾愷先後拜給事中後貽吉坐法誅運熙沚俱謫外啟祚以甄別致仕台孫外轉少參能其官者蓋少云

賜印記

不佞常見

世祖賜戶部尚書戴公明說銀印一文曰米芾畫禪煙巒如靚明說克傳圖章用錫凡十六字戴每為人作畫

則用之於上司農大臣此以繪事見褒耳

賜畫像

世祖寵禮大臣命內廷待詔為金太傅之俊及先外大父寫像凡數易稿必極肖而後止極裝潢模寫之工經年始成復

親臨直房頒賜一時傳以為榮多為詩歌詠之時為諸大臣寫

像者多然皆從龍舊勳不佞所見者此二軸也

親弔

庚子冬

世祖臨義王孫可望喪悲哭致奠時諸王暨大僚陪位不佞申吉為大理卿在列親覩其事云

君臣同游

世祖優禮羣下明良一體同游之盛多不可記憶丙申端陽節



上在西苑汎龍舟

召羣臣四品以上暨諸詞臣宴游時不佞申吉待罪西清獲預其盛至於南苑大蒐必召大僚禁近觀兵賜宴歲歲舉行若直講幄者出扈豫游入陪曲讌習以為常喜起之風前伐所未有也

賜大臣子

順治乙未冬先外大父扈從南苑忽

召男恣之入見

命坐賜茶解貂服一襲賜之卽  
上所常御者真異典也

賜蟒

蟒衣之賜舊惟大臣閒有之順治乙未科修撰史大成編修戴王綸秦弑庶吉士馮源濟陳鼓家田種玉綦汝楫田逢吉党以讓王澤弘鄧鍾麟胡簡敬及不佞申吉

俱獲賜蟒衣一襲中有兩被賜者異典從來未有

官制沿革

本朝官制悉仍明舊唯內閣不設置內三院以理機務為祕書為國史為弘文大學士秩正二品學士秩正三品講讀學士秩正四品講讀正五品史官秩如故自大學士至庶吉士皆分隸三院而其職掌均未有易也迨順治戊戌改院為閣有中和保和文華武英四殿文淵東閣之名大學士秩正五品居其官者多以公孤尚書職兼之學士秩從五品而以禮部侍郎職兼之其餘統歸之於翰林院自掌院學士而下品秩一復前代之舊至康熙改元仍改殿閣為內三院并翰林之名廢而不置而官制大變矣

國初未設詹事等官至順治癸巳始置正詹事一員少詹事二員左右春坊庶子二員諭德二員中允四員贊



善四員司經局洗馬一員至戊戌年復廢

丁憂恩典

順治閒戶部尚書王公祚總河尚書朱公之錫俱不  
准丁憂令在任守制後二公皆得假歸治葬而已

天子賜名號

順治癸巳賜侍讀藍滋名潤己亥賜先外大父少傅公  
號中軒

### 澹餘筆記



